

LES
SENTIMENS
D'ARISTIDE

Sur les affaires Publiques.




A PARIS,

M. DC. XXXIX.

Code
F
39
326
1149

MEMORIAL
LIBRARY



1871



LES SENTIMENS D'ARISTIDE,

Sur les affaires Publiques.



Es mouuemens fascheux qui trauaillent cét Estat, ont émeu les Esprits, & produit vn nombre infiny de Pieces, parmy lesquelles il y en a de bon aloy; & tant d'autres si ridicules & si impertinentes, que les Esprits lassez à peine se peuent arrester à ce qui est de meilleur & de plus solide, veu mesmement qu'il est bien difficile en vn mesme suiet de n'auoir pas les mesmes pensées, & que la redite des meilleures choses fatigue l'esprit & luy déplaist. Mais d'autant que personne, au moins que ie sçachen'a examiné nos affaires dans le detail, & pour en faire iugement dans les reigles de la vraye Politique, ie suis plus hardy à produire mes sentimens, protestant qu'ils sont sans preiugé, & que ie n'ay autre passion ny interest, que de faire voir la verité toute pure & sans desguisement.

Ie dis donc premierement qu'il ne faut pas tousiours iuger des affaires par les euenemens; car encores que les effets donnent le plus souuent la connoissance des causes, il se rencontre quelquesfois de telles circonstances & si differentes qu'elles forcent à s'éloigner de la reigle generale, qu'il faut plier selon l'occurrence du temps. Et combien que cela ait aussi lieu dans le gouvernement des Estats; toutesfois il est bien certain que les maximes de la Politique produisent des effets plus reglez qu'ils ne sont pas dans les autres sciences. Et de fait celuy qui sera versé dans l'Histoire, qui est la veritable experience de la Politique, reconnoistra que presque tousiours vne mesme cause produit vn mesme effet, & que dans la conduite d'vn Estat les euenemens ont vn rapport necessaire à la façon de gouverner.

Considerons le Royaume de France en l'estat auquel il estoit lors du decés du deffunt Roy; vn Ministre aussi absolu qu'il en fut iamais, l'auoit gouverné vn long temps. Il a tousiours entretenu la guerre, comme absolument necessaire à la conseruation de son autorité; & ceste maxime a tousiours esté pratiquée en tous Estats, ou quelque particulier s'est emparé de l'autorité du Prince. Le peuple estoit accablé d'vn nombre infiny d'imposts, les Prouinces & la campagne ruinees gemif-

soient sous la tyrannie insupportable des Partisans, & presteurs volontaires ou vsuriers, qui sous pretexte du nom du Roy enuoyoiét par tout leurs satellites & leurs bourreaux executer leurs brigandages avec des cruantez épouventables: le desordre venu à tel point; que les Partisans dispoisoient des Intendans ainsi que de leurs valets, les changeât à leur volonté, & dressant eux mesmes les Arrests tel qu'il leur plaisoit : & pour ce que ces Partisans auoient esté les creatures d'un nombre infini d'officiers, ils ont creu qu'ils pouuoient destruire leur ouurage, & apres auoir ruiné les anciens Officiers par les nouveaux, ils ont perdu les vns & les autres, la violence & la fourbe, l'inuention de nouveaux impôts, & le pretexté de tant de taxes, faire & defaire, a esté l'exercice de ces bons personages, & la matiere d'une infinité d'Arrests du Conseil, si contraires les vns aux autres, la Noblesse n'auoit pas mieux esté traitée; la Iustice estoit opprimée, par vne violence sans exemple, & iusques à l'infamie.

Les choses estoient en cét estat lorsque la Reine qui auoit eu sa part des afflictions publiques, a esté faite Regente de ce Royaume: si elle eust esté fidèlement conseillée, elle n'eust iamais retenu pour Ministres d'Estat, ceux pour lesquels on auoit tant d'auerfion, & qui auoient attiré la haine de tous les peuples. C'est vne maxime constante qui ne changera iamais, qu'apres le decés d'un Prince, il faut garder les Ministres qui ont bien gouverné, & qui sont aymez du peuple, & au contraire il faut éloigner, non seulement ceux qui ont mal reussi; mais mesmes ceux qui sont odieux sans en auoir donné sujet; l'inobseruance de ceste regle a fait perir des Estats, & donné d'estranges secouffes à nostre Couronne. Galba perit, pource qu'il se seruit de Halotus, & qu'il vouloit proteger Tigellinus qui auoient esté Ministres des cruantez de Neron. Childeric fils de Merouée, Louys XI. Charles V. & Charles VI. ont éprouué la verité de ceste maxime: mais l'exemple de Charles VII. est sur tout remarquable, il auoit prés de soy pour principaux Ministres Tannegui du Chastel, Jean Louuet President de Prouence, & l'Euesque de Clermont qui luy auoient rendu de tres grands seruices: En ce temps là suruint vne guerre contre les Ducs de Bourgogne & de Bretagne, qui offriront de faire la paix, pourueu qu'on chassast d'aupres du Roy ceux de son Conseil. Cest trois bons personages François, & bons François, pour donner la paix à l'Estat conseillent au Roy d'y consentir, ils se retirét en leurs maisons, & n'essayent point à se conseruer dans le Ministère par le faux pretexte de l'autorité du Roy, c'estoient là de fidelles Ministres; mais ils sont morts, & beaucoup de ceux qui sont auourd'huy aymeroient mieux voir perir l'Estat, que de reculer d'un pas. Je ne doute point que le Cardinal de Richelieu, s'il eust suruécú le deffunt Roy, n'eust agy tout autrement pendant vne minorité, qu'il n'auoit fait auparauant; il estoit trop habile homme pour ne preuoir pas les souflemens de tout un Royaume; & plusieurs sont persuadez qu'il eût
essuyé

essuyé toutes les larmes qu'il auoit fait répandre, & qu'une paix glorieuse eust esteint la haine des peuples, & couronné toutes ses actions.

Ceste premiere faute de n'auoir pas changé les principaux Ministres a esté suiuiue d'une autre, qui n'est pas moins dangereuse, en retenant vn premier Ministre, non seulement odieux, mais estrange: car ceste maxime est toujours vraye qu'il arriue de grands desordres quand on remet l'administration d'un Estat entre les mains d'un Estranger. Toutes les histoires sont pleines des malheurs qui sont arriuez aux peuples par des Estrangers. En 558. vn Chancelier Estranger dans le Royaume de Sicile fut cause que tous les François y furent massacrez, & ie diray en passant que les historiens remarquent que les Italiens ont toujours esté fort enclins à massacrer les François, tescmoin encores les Vespres Siciliennes qu'on n'oubliera iamais. Apres la Paix faite entre Iean Roy de France, & Edoüard Roy d'Angleterre pour auoir voulu mettre des Anglois dans les premieres charges de l'Aquitaine, le Roy d'Angleterre perdit par ceste mauuaise conduite tout ce qu'il auoit gagné en la journée de Poitiers. Iean Duc de Bretagne perdit son pays pour auoir preferé des Estrangers à ses suiets: Le Roy Charles VIII. esprouua bien ceste verité au voyage de Naples, & perdit ce Royaume qu'il pouuoit conseruer en France. En 607. vn Maire du Palais estrange introduit par vne Reyne estrange, fut la cause d'une guerre ciuile: la mesme chose arriua du temps de Louys le Debonnaire, à cause d'un certain Espagnol nommé Berard, & de tels exemples on pourroit faire de iustes volumes. Tristes effets d'une mesme cause, qu'on doit bien eüiter, puis qu'ils sont toujours funestes & malheureux.

Et combien que les affaires de cét Estat ne se puissent conduire par les maximes de Machiauel, parce que les François ayment bien leurs Roys par dessus toutes choses; mais ils peuuent moins souffrir qu'aucune autre nation vn Ministre Estranger & Tyran. Toutesfois le Cardinal Mazarin a obserué ponctuellement ses maximes, seule cause de nos desordres, mais qui le feront infailliblement de sa perte.

Machiauel en plusieurs endroits de ses discours, particulierement au liu. 1. chap. 1. & au liu. 2. ch. 7. & au liu. 3. ch. 16. auance ceste maxime, *Que pour se maintenir en credit, il faut abbaïsser le peuple, & le tenir pauvre*; maxime qui a depouillé plusieurs Roys de leurs Royaumes. Le fils de Salomon en perdit les dix parts, & Chilperic fut chassé pour ce sujet. Certainement la force du Prince consiste en la richesse de son pays, c'est ce qui rend vn Estat fort & puissant, & pour se conseruer & pour s'accroïstre. Le Thresor des Roys est de conseruer leurs Richesses entre les mains, & dans la bourse de leurs Sujets: Et il est si peu iuste qu'un Ministre d'Estat, & vne centaine de voleurs apres luy, Partisans, presteurs volontaires, ou vsuriers, emportent toutes les Finances que la vraye Politique enseigne, que les Roys ne doiuent pas mesme amasser dans leurs Espargnes de grands thresors, si ce n'est pour quelque grand dessein. Le thresor de soixante millions d'or que laissa Tybere perdit Caligula; & celuy de Charles le Sage diuisa les freres, & fut cause d'une guerre ciuile. Le Cardinal Mazarin a suiuy Machiauel, non seulement pour se maintenir en credit, mais pour auoir la depouille de tout vn

Royaume: en sorte que sans la despense qui paroisst, les Comptans de deux années se montent à cent six millions, ce qui est presque incroyable, tant de charges, & de subsides ayant en fin accablé le peuple aujourdhuy réduit à vne extrême necessité.

Au liu. 2. chap. 1. & au liu. 3. chap. 3. ce Politique Florentin, dit *Qu'il est bon de tenir les Peuples en division, & de faire mourir les amateurs du bien Public*, & remarque à ce propos pour vne grande faute en la Politique de ce que Tarquin dernier Roy de Rome, ne fit pas tuer Brutus.

Cette maxime est toute tyrannique, & les Historiens remarquent que lors que Tarquin changea la domination Royale, en vne domination violente, il vint à mespriser la Noblesse, les Patriciens & le peuple corrompit la Justice, osta l'autorité au Senat qu'il auoit tousiours eüe, faisoit perir ceux qui se plaignoient du desordre, & mourir plusieurs grands & notables personnages seuerement & sans forme de Justice, imposoit des tribus extraordinaires sur le peuple, & ruinoit tout ce qui estoit dans l'estenduë de l'Empire.

Nostre Cardinal n'a rien oublié de tout cela, les impositions de toutes sortes, les proscriptions des plus gens de bien, & leur mort secrette, en fournissent vne preuue bien authentique, il s'est moqué des plaintes & des gemissemens des pauures, de toutes les remonstrances qui ont esté faites, & semble qu'il ait voulu rehausser l'esclat de sa pourpre du Sang du pauure peuple.

Ce fidelle imitateur de la doctrine de Machiauel, a suiuy encore ce precepte qui se trouue au liu. 2. ch. 13. & 18. du Prince, & au liu. 1. chap. 42. des discours: *Qu'on doit s'estudier à manier les esprits pour les tromper, & qu'on ne doit craindre pour cet effet de se parjurer & dissimuler*; ce que le Cardinal a pratiqué, & pratique encores aujourdhuy fort exactement.

Mais il faut voir si dans son dessein mesmes il ne s'est point mesconté, lors que le Parlement voulut arrester les desordres de l'Etat; ce qui donna lieu aux Barricades, fut qu'au preiudice d'une Conference commencée, & au iour d'une Feste de reioüyssance publique; on enleua violemment deux des principaux Senateurs, zelez au bien public, & encores au mesme téps qu'on auoit enuoyé chez l'un pour l'aduertir de se trouuer au lieu assigné: ce qui s'est passé iusques à la Declaration du mois d'Octobre dernier, a esté conduit d'un mesme Esprit, & comme il a veu qu'il ne pouoit effectuer ce qu'il s'estoit promis ny empescher l'effet de cette Declaration, qui en quelque sorte arrestoit le cours du plus grand mal: dans la plus rude saison, il enleua le Roy de nuit, & accuse le Parlement de l'auoir voulu liurer aux Ennemis de l'Etat. Paris est bloqué; & on fait ce qu'on peut pour ruiner cette grande Ville. Si le dessein eust reüssi Paris seroit bruslé, & tous les Habitans se seroient massacrez les vns & les autres: ce qui s'est fait és environs de Paris, & à l'égard de tant d'ames innocentes fait assez iuger quelle estoit l'intention pour le dedans.

Encores que les Estats, & la société humaine ne puissent subsister sans la Foy, Machiauel enseigne le contraire. Tacite remarque, & l'Histoire nous apprend combien l'obseruatiõ de la parole & les traitez de bonne foy ont seruy aux Romains qui en estoient Religieux obseruateurs, & qui tenoient pour vne maxime inuiolable, que la foy ne veut estre ny violée, ny suspecte,

aussi ont il tousiours reietté les moyens de fraude qui leur estoient proposez, pour l'aceroissement de leur Republique. Ces sages Politiques scauoient bien que la fourbe fait perdre toute creance, & qu'ordinairement elle produit les plus fascheux effets sur ses propres auteurs: il y en a vne infinité d'exemples dans les Histoires, particulièrement en celle de France, & i'estime qu'aujourdhuy le Cardinal Mazarin l'esprouue en sa personne, les choses passées feront tousiours craindre l'aduenir, & maintenant qu'il se dit Seruiteur & amy du Parlement & du peuple, ie ne pense pas qu'il y ait personne qui le croye & qui ne se deffie tousiours d'vn Italien reconcilié: toute sa procedure n'est qu'vn tissu de fourbes, les propositions les plus specieuses ne sont qu'vn piege, & vn feu caché d'vn peu de cendre qui se ralumera si-tost que les affaires seront au point qu'il les demande.

Ie ne le blasme pas d'auoir trouué son contrepoids entre les deux premiers Princes, & c'est ce qui l'a empesché de tomber, & luy a esté encores auantageux de rejeter sur vn autre autant qu'il a pû, tous les crimes qui se sont commis & tout le mal qui s'est fait, & de s'estre voulu descharger d'vne partie de la haine qu'on auoit pour luy sur vne personne plus considerable: le Cardinal de Richelieu s'est seruy adroitement de cet artifice en deux ou trois rencontres, mais il se seroit bien donné garde de vouloir perdre Paris, il n'y a qu'vn Estranger qui puisse auoir cette pensée; mais quand le Cardinal de Richelieu auroit eu ce dessein, il ne se seroit iamais seruy de la force ouuerte, car c'est tenter l'impossible à moins que de risquer euidentement tout le Royaume.

C'est encores bien iustement que le Cardinal Mazarin craignoit que les Barricades ne fussent immediatement suiuiues de l'Arrest rendu le 8. Ianuier, & qui fut preuenü par la Conference: vray-semblablement il eust esté contraint de ceder, & n'eust pas eu le temps de se premunir ainsi qu'il a fait & autant qu'il a pû contre cet orage, qui dès ce temps-là s'estoit esleué pour le perdre. Il a abusé de la procedure sincere du Parlement, & tout ce dont il se peut vanter, c'est d'auoir trompé des gens de bien: que si leur retenüe & leur prudence à retardé l'auancement des affaires, ils n'en sont point coupables, & c'est en cela qu'il ne faut pas iuger par les Euenemens; car i'aduouë que comme cette importante affaire a donné à toute la France, l'Esperance d'vne prompte reformation dans l'Etat, & la Paix Generale, d'abord tout sembloit conspirer à ce dessein, & maintenant on iuge bien que si tous les esprits n'eussent eu que la pensée du bien public, sans y mesler leurs interests qu'il y auroit vne solide paix. Ce n'est pas mon dessein d'examiner les raisons de tout ce qui s'est passé, si dans l'esperance d'vn accommodement, on a bien fait de n'aigrir pas les affaires, & de n'enuoyer pas si tost les Lettres circulaires, si l'on a deub mettre hors la ville, les bouches inutiles ou non. Si dans le commencement on a pû empescher le blocus de Paris, & conseruer les passages les plus importants, si la leuée des gens de guerre a respondu à beaucoup pres à la l'euée d'es

deniers. Si on deuoit secourir Charenton, ou non; & si on n'auoit pas ce dessein, pourquoy on n'a pas conserué la Garnison: s'il est vray que sans mettre les Habitans de Paris au hazard, il y auoit moyen au retour de l'armée de monsieur le Prince en ses postes, de luy donner vn notable echec. Si on a deub abandonner Brie-Comte-Robert, &c. Ie n'entreprends pas de raisonner là dessus, cela demande plus de cognoissance que ie n'en ay, mais ie pense que sans me tromper, ie puis veritablement & iustement m'escrier, *O interest particulier!* fausse diuinité, mais pourtant toute puissante icy bas, & plus suiuiue que le vray Dieu, que tu persuade aisément ce qu'il te plaît: qu'on appaise vn mescontent, qu'on satisface à l'ambition d'vn autre, qu'on recompense vn frere, & qu'on distribuë des Benefices, qu'on donne vn gouuernemēt, vnc charge, vne suruiuance, vne pētion, &c. le pauvre Public se verra bien-tost abandonné d'vne partie de ses Zelateurs plus ardans, qui se prennent dans ces pieges, & qui payent tousiours la peine de leur lascheté. Ce n'est pas que le changement d'aduis procede tousiours de cette cause, vn Medecin expert, proposera vn remede, pour chasser le mal qui luy est present; Que si la fiebure suruient, & qu'elle predomine, on change les remedes, & on ne pense plus qu'à ce qui est le plus à craindre. Vn bon Politique en fait ainsi: on quitte le soin d'vn moindre mal, pour en eũiter vn plus grand, & qui presse; mais cet interest particulier, remuë si puissamment, toutes les facultez de l'ame, qu'en offusquant la pureté de la raison, il arriue que ceux qui sont si attachez à eux-mesmes, quittent des moyens faciles, qui leur pourroient donner ce qu'ils demandent, pour suiure vne fausse prudence, qui les trompe & qui les punit iustement. Mais entre tous ceux qui sont possedez par ce Demon d'interest, il n'y en a point qui soient plus extrauagans, que les Partisans & ces presteurs volontaires; si on les veut croire, l'authorité du Roy ne peut estre conseruée, que dans leur protection; & ils font cōsister cette authorité absoluë, à ruiner tous les sujets du Roy, & à perdre le Royaume: certainement cela est digne de commiseration d'en voir quelques-vns d'entreux personnes d'honneur, en toute autre chose, si aueugles en ce point, & si sensible, à leur interest, qu'ayant le Iugement entierement peruertey, ils s'emportent à des extrauagances pitoyables, à des souhaits criminels, & à des pensées execrables à l'esgard de Dieu, & à l'esgard des hommes. Semblables à ces fols, qui nes'esloignēt du sens commun, & de la raison que lors qu'ils viennent à leur foible, & à parler des choses qui ont quelque rapport à la cause de leur mal. De tant de passions si differētes, & de tant de sorte d'Interests, il ny a que Dieu seul, qui en puisse tirer la paix que nous luy demandons, que chacun cherche son Interest tant qu'il voudra & qu'il suiue son sens, & ses appetits, on fera tousiours la volonté de Dieu, quand on ne le voudroit pas, & lequel sçaura bien faire reũssir toutes choses, selon son Conseil secret, & sa Sagesse eternelle.

